

նշանական կենդանիներու, ձիու մը մարմինը և չորս ոտքերը չորս կենդանիներուն իւրաքանչիւրէն մէյմէկ ընդունելով: Դարձեալ եկեղեցին յաղթական կառք մըն է հրեշտակէ մը առաջնորդուած, և անոր լծուած են առիւծը, եզը և արծիւը (A. Hand. էջ 17-22):

դ) Վերնասան եկեղեցիին հաստատութեան աւանդութիւնը. — Ըստ հայ եկեղեցւոյ աւանդութեան՝ Վերնատան եկեղեցին հաստատած են Առաքեալները. եւ ասիկա յայտնի կ'ըլլայ երբ Աշխարհամատրան կիւրակէի հարց շարականին Ա. եւ Բ. տուններուն մէջ կը կարդանք. «Երկրպագեմք քեզ Քրիստոս, որ ի ձեռն սրբոց Առաքելոցն ծանուցարմեզ, Տէր Աստուած հարցն մերոց»: Բ. տուն. «Եւ աշակերտեալք ի սրբոց Առաքելոցն ուսաք փառաւորել զքեզ ի տաճարի սրբութեան քո, զոր հիմնեցուցեր ի վերայ վիմի հաւատոյ, Աստուած հարցն մերոց»: Այս խօսքերը ցոյց կուտան ըստ ոմանց սա աւանդութիւնը թէ Առաքեալները միասին կանգնեցին մատուռ մը, կամ Սիոնի Վերնատունը եկեղեցիի փոխեցին՝ որ ըսուեցաւ Աշխարհամատրոն, այսինքն մայր աշխարհի բոլոր եկեղեցիներուն կամ բոլոր հաւատացելոց ժողովարան: Բայց աւելի հաստատուն է այն աւանդութիւնը թէ Առաքեալները եկեղեցիի վերածեցին սուրբ Վերնատունը, և Ս. Կիւրեղ Երուսաղէմացին զայն կը կոչէ «Եկեղեցի Առաքելոց» (Կոյ. Ժէ. 37):

ե) Այս մասին ուրիշ աւանդութիւններ. — Եպիփան (315-413) կը պատմէ թէ Երուսաղէմի կործանումէն յետոյ Սիոնի մէջ «քանի մը սակաւաթիւ տուներէ զառ կար քրիստոնեաներու յատուկ փոքր տուն մը, ու